



選詩補爵里

漢

漢武帝

諱徹景帝子詩一首

四皓

東園公姓唐名秉字宣明綺里季姓朱名暉字文季夏黃公姓崔名廣字少通齊人角里先生姓周名術字元道河內人四人俱隱商山詩一首

卓文君

西京雜記曰司馬相如將聘茂陵人女為妾文君作白頭吟以自絕相如乃止詩一首

蔡邕

漢書武帝紀

漢書武帝紀

字伯喈陳留圉人也性篤孝建寧中辟司徒
喬玄府出補河平長召拜郎中校言東觀遷
議郎靈帝崩董卓爲司空辟邕遷向書侍中
及卓被誅王允收邕付廷尉遂死獄中詩一
首

鄒炎

字文勝范陽人有文才尚志氣靈帝時州郡
辟命皆不就炎後風病恍惚性至孝遭母憂
病甚發動妻始產而驚死妻家訟之
炎病不能理對竟死獄中詩二首

孔融

字文舉魯國人孔子之後少有重名舉高第
爲侍御史遷虎賁中郎將以忤董卓轉議郎
出爲北海太守累遷太中大夫數
以書爭曹操爲操所害詩二首

秦嘉

字士會隴西
人詩二首

辛延年

爵里無考
詩一首

宋子侯

爵里無考
詩一首

古辭

蜀漢

諸葛亮

字孔明瑯琊
人詩一首

魏

魏武帝

註見前
詩一首

魏文帝

註見前
詩三首

甄皇后

新都故事云魏文帝甄皇后袁紹中子熙之妻也太祖破紹文帝時為太子遂納為夫人生明帝後為郭后所譖賜死詩一首

魏明帝

諱獻文帝
子詩一首

曹植

註見前
詩四首

陳琳

字孔璋廣陵人避難冀州袁紹使典文章袁氏敗後歸太祖太祖使琳與阮瑀並為司空軍謀祭酒管記室軍國書檄多琳瑀所作徒門下督詩一首

徐幹

字偉長北海人為司空軍謀祭酒掾屬五官中郎將文學詩一首

阮瑀

字元瑜陳留人少受學于蔡邕曹操辟為司空軍謀祭酒管記室後為倉曹掾屬建安十七年卒
詩二首

吳質

字季重濟陰人以文才為文帝所重官至振
威將軍假都督河北諸軍事封列侯大和四
年入為侍中卒謚
曰威侯詩一首

何晏

字平叔南陽宛人尚主又好色故黃初時無
所事任正中曹爽用為中書主選舉宿舊者
多得濟拔為司馬
宣王所誅詩一首

嵇康

註見前
詩二首

阮侃

字德如尉氏人魏衛尉卿阮共之子有俊才
而飾以名理風儀雅潤與嵇康為友仕至河
內太守
詩一首

阮籍

註見前
詩五首

晉

張華

註見前
詩六首

成公綏

字子安東郡白馬人也少有俊才詞賦甚麗
張華雅重綏薦為太常博士歷秘書郎遷中
書郎每與華受詔竝為詩
賦泰始九年卒詩一首

傅玄

註見前
詩二首

傳咸

註見前
詩一首

劉伶

字伯倫沛國人也肆意放蕩悠焉獨暢武帝泰始初封策盛言無為之化以無用罷竟以壽終詩一首

陸雲

註見前
詩一首

潘岳

註見前
詩二首

潘尼

註見前
詩一首

張載

註見前
詩一首

棗腆

字玄方以文章顯永嘉中為襄城太守詩一首

孫綽

字興公統之弟博學善屬文為著作佐郎累遷散騎常侍轉廷尉卿領著作卒詩一首

庾闡

字仲初潁川人性好學九歲能屬文初為西陽王掾累遷尚書郎蘇峻之難出奔郟鑒為之參軍峻平召為散騎侍郎補零陵太守徵拜給事中詩一首

曹毗

字輔佐譙國人少好文籍善屬詞賦郡察孝廉除郎中蔡謨舉為佐著作郎累遷至光祿勳詩一首

陶潛

註見前詩十九首

支遁

字道林本姓關氏陳留人或云河東林慮人幼有神理聰明秀徹隱居餘杭山年二十五出家後人刻於沃州小嶺立寺行道晉哀帝即位遣使徵請出都止東安寺講道行雷三載上書辭詔許之乃收跡刻山以晉太和元年終詩二首

惠遠

雁門樓煩人本姓賈氏年二十一遇釋道安以為師研求法藏高悟冥贖襄陽既沒振錫南遊結宇匡廬自年六十不復出山年八十三而終詩二首

宋

宋孝武帝

諱駿字休龍文帝第三子封武陵王元凶劾弒逆舉兵誅劭遂即大位在位十一年詩三首

劉義恭

武帝桓美人所生也元嘉中為司徒建武三年為太宰後為廢帝所殺明帝定亂復舊爵邑謚日文獻詩一首

何承天

東海剡人博通古今尤精曆數仕宋領著作郎官至御史中丞詩一首

謝莊

字希逸弘微之子仕文帝時為隨王誕記室遷太子中庶子孝武立除侍中歷吏部都官尚書左衛將軍加給事中又領參軍將軍明帝時加金紫光祿大夫卒詩一首

謝靈運

註見前詩五首

謝惠連

註見前詩一首

鮑照

註見前詩九首

吳邁遠

好為篇章宋文帝聞而召之及見曰此人聯絕之外無所復有好自誇而蚩鄙他人每作詩得稱意語輒擲地呼曰曹子建何足數哉詩二首

荀杲

字茂祖元嘉初以文義至中書郎詩一首

湯惠休

字茂遠初入沙門名惠休孝武命使還俗本姓湯位至揚州刺史詩一首

齊

王融

字元長瑯琊人僧達之孫也少警慧博涉多通仕齊武帝遷秘書丞歷中書郎竟陵王子

良拔為寧朔將軍武帝大漸謀立子
良及鬱林郎位下獄賜死詩八首

謝朓

註見前
詩九首

孔稚珪

字德璋會稽山陰人少學涉有美譽高帝為
驃騎取為記室參軍建武初遷冠軍將軍遷
太子詹事散騎常侍卒稚圭風韻清疎好文
詠與外兄張融情趣相得居宅盛營山水憑
几獨酌傍無雜事門庭
之內內艸茅不剪詩一首

梁

梁武帝

姓蕭氏諱衍字叔達初仕齊累遷隨王鎮西
諮議參軍後封東昏而自立四傳五十五年

詩四
首

昭明太子

諱統字德施武帝長子也生而聰睿讀書數
行竝下每遊宴祖道賦詩皆屬思便成無所
點易寬和容眾接引才俊喜文章聚書至
三萬餘卷著述甚多年三十一薨詩一首

簡文帝

諱綱字世纘武帝第三子也六歲能屬文讀
書十行俱下辭藻豔發雅好賦詩然又傷輕
靡時號宮體初封晉安王雲麾將軍丹陽尹
歷充荆南徐雍益五刺史昭明太子薨立為
皇太子及嗣位之後侯景
制命期年遇弒詩六首

元帝

諱繹字世誠武帝第七子也初封湘東王為
會稽太守人為侍中丹陽尹出為使持節都

督荊州刺史鎮西將軍侯景反逆遣王僧辯討誅之遂即位於江陵西魏見伐兵敗出降為梁王睿所害詩三首

沈約

註見前詩二首

張率

字士簡吳郡人年十二能屬文稍進作賦頌至年十六向二千許首起家齊著作佐郎遷尚書殿中郎太子洗馬武帝手敕曰相如工而不敏故臯速而不工卿兼之矣遂遷秘書丞後遷黃門侍郎出為新安太守卒詩二首

柳惔

字文暢河東解人也少有志學工為詩善尺牘齊竟陵王引為法曹參軍累遷太子洗馬邑惔候謁石頭以為冠軍將軍征東府司馬天監初除長史累遷左民尚書廣州刺史徵為秘書監復為吳興太守為政清靜民吏懷之感疾卒詩一首

何遜

字仲言東海剡人承天曾孫也天監中起家奉朝請遷建安王水曹參軍王愛文學與宴遊及遷江州遜猶掌書記復為安西安成二王參軍事兼尚書水部郎除廬陵王記室復隨府江州未幾卒詩一首

蕭鈞

齊高帝子出繼衡陽王性好學善屬文與王智深以文章相賞會濟陽江淹亦遊焉按唐書亦有蕭鈞蕭瑀從子也仕至太子卒更令詩一首

王筠

字元禮一字德柔瑯琊人僧虔之孫博之子幼清靜好學與從兄泰齊名歷仕尚書殿中郎累遷太子洗馬中書舍人與殷鈞竝以方雅為昭明太子所禮詩一首

劉孝綽

字孝綽本名冉彭城人七歲能屬文梁天監初起家為著作佐郎遷秘書丞甚為武帝及昭明所禮累遷尚書吏部坐事左遷臨賀王長史卒孝綽雖負才陵忽前後五免然辭藻為後進所宗詩三首

劉孝威

字孝威孝勝之弟氣調爽逸初為晉安王法曹太清中遷太子中庶子通事舍人侯景亂孝威於圍中得出西上至安陸卒詩二首

劉峻

字孝標平原人年八歲與母沒於魏齊永明中奔江南為蕭遙欣刑獄梁天監初召入西省典校秘閣普通三年卒門人謚曰玄靜先生詩一首

戴泉

爵里無考詩一首

陳

張君祖

按張君祖庾僧淵諸詩皆恬澹雅逸有晉風歷選陳世無此作也考高僧傳有康僧淵竺法雅者竝在晉成帝時疑即此人歟廣弘明集云陳張君祖既不能明姑列于此爵里無考詩三首

庾僧淵

爵里無考
詩一首

北魏

温子昇

字鵬舉其先太原人祖避難家於濟陰博覽
百家文章清婉熙平初舉高第擢御史孝莊
卽位補南主客郎中遷散騎常侍侍中大將
軍領本州大中正齊文襄引以爲咨議及元
瑾荀濟等作亂文襄疑子昇
知其謀下晉陽獄死詩一首

隋

隋煬帝

諱廣隋文皇帝第二子開皇元年立爲晉王後
以陰謀廢奪太子勇得立爲太子又五年弒

父自立在位十二年荒淫暴虐下
不堪命爲宇文化及所弒詩一首

楊素

字處道弘農華陰人仕周武帝以平齊加上
開府封成安縣公隋高祖爲丞相素深自結
納受禪後加上柱國進封越國公累官右僕
射掌朝政晉王廣之弒立素之謀也大業初
遷尚書令拜太師改
封楚公卒詩一首

盧思道

字子行范陽人聰爽俊辯才學兼著齊天保
中解褐直中書省待詔文林館周武帝平齊
授儀同三司隋高祖爲丞相遷武陽
太守開皇間爲散騎侍郎詩一首

薛道衡

字玄卿河東汾陰人少孤專精好學甚著才
名爲齊尚書左外兵部齊亡周武引用爲御

史二命士隋高祖受禪除內史累遷上儀同
三司出檢校襄州煬帝嗣位道衡上文皇帝
頌帝覽之不悅尋以
論時政見害詩一首

選詩補爵里

里

選詩補

漢

秋風辭

漢武帝

廣陵顧大猷所建編

秋風起兮白雲飛
艸木黃落兮雁南歸
蘭有秀兮菊有芳
懷佳人兮不能忘
汎樓船兮濟汾河
橫中流兮揚素波
簫鼓鳴兮發權歌
歡樂極兮哀情多
少壯幾時兮奈老何

紫芝歌

四皓

莫莫高山

一作漢
漢商洛

深谷逶迤曄曄紫芝可以療饑唐



虞世遠吾將何安一作歸駟馬高蓋其憂甚大富貴之
畏人今不若貧賤之肆志一作富貴而畏人不如貧賤而輕世

白頭吟

卓文君

皚如山上雪皎若雲間月聞君有兩意故來相決絕
今日斗酒會明日溝水頭躑躅御溝上溝水東西流
淒淒復淒淒嫁娶不須啼願得一心人白頭不相離
竹竿何嫋嫋魚尾何篸篸男兒重意氣何用錢刀爲

翠鳥

蔡邕

庭陬一作前有若榴綠葉含丹榮翠鳥時來集振翼修
形容回顧生碧色動搖揚縹青幸脫虞人機得親君

子庭馴心托君素雌雄保百齡

見志詩二首

酈炎

大道夷且長窘路狹且促修翼無卑棲遠趾不步局
舒吾凌霄羽奮此千里足超邁絕塵驅倏忽誰能逐
賢愚豈常類稟性在清濁富貴有人籍貧賤無天錄
通塞苟由已志士不相卜陳平敖里社韓信釣河曲
終居天下宰食此萬鍾祿德音流千載功名重山嶽

二

靈芝生河洲動搖因洪波蘭榮一何晚嚴霜瘁其柯
哀哉二芳艸不植泰山阿文質道所貴遭時用有嘉

絳灌臨衡宰謂誼崇浮華賢才抑不用遠投荆南沙
抱玉乘龍驥不逢樂與和安得孔仲尼爲世陳四科

雜詩

孔融

遠送新行客歲暮乃來歸入門望愛子妻妾向人悲
聞子不可見日已潛光輝孤墳在西北常念君來遲
寒裳上墟丘但見蒿與薇白骨歸黃泉肌體乘塵飛
生時不識父死後知我誰孤魂遊窮暮飄飆安所依
人生圖享息爾死我念追俛仰內傷心不覺淚霑衣
人生自有命但恨生日希

臨終詩

官多令事敗器漏苦不密河清蟻孔端山壤由猿穴
涓涓江漢流天牕通冥室讒邪害公正浮雲翳白日
靡辭無忠誠華繁竟不實人有兩三心安能合爲一
三人成市虎浸漬解膠漆生存多所慮長寢萬事畢

留郡贈婦詩二首

並序

秦嘉

嘉爲上郡掾其妻徐淑寢疾還家不獲面別贈詩
云爾

人生譬朝露居世多屯蹇憂艱常早至歡會常苦晚
念當奉時役去爾日遙遠遣車迎子還空往復空返
省書情悽愴臨食不能飯獨坐空房中誰與相勸勉

長夜不能眠伏枕獨展轉憂來如循環匪席不可卷
二
皇靈無私親爲善荷天祿傷我與爾身少小罹災獨
既得結大義歡樂苦不足念當遠離別思念叙欵曲
河廣無舟梁道近隔丘陸臨路懷惆悵中駕正躑躅
浮雲起高山悲風激深谷良馬不迴鞍輕車不轉轂
針藥可屢進愁思難爲數貞士篤終始恩義不可促

羽林郎

辛延年

昔有霍家奴姓馮名子都依倚將軍勢調笑酒家胡
胡姬年十五春日獨當爐長裙連理帶廣袖合歡襦

頭上藍田玉耳後大秦珠兩鬟何窈窕一世良所無
一鬟五百萬兩鬟千萬餘不意金吾子娉婷過我廬
銀鞍何煜爚翠蓋空踟躕就我求清酒絲繩提玉壺
就我求珍肴金盤鱠鯉魚貽我青銅鏡結我紅羅裾
不惜紅羅裂何論輕賤軀男兒愛後婦女子重前夫
人生有新故貴賤不相踰多謝金吾子私愛徒區區

董嬌嬈

宋子侯

洛陽城東路桃李生路傍花花自相對葉葉自相當
春風東北起花葉正低昂不知誰家子提籠行采桑
纖手折其枝花落何飄颺請謝彼姝子何爲見損傷

高秋八九月白露變爲霜終年會飄墮安得久馨香
秋時自零落春月復芬芳何時盛年去歡愛一作永
相忘吾欲竟此曲此曲愁人腸歸去酌美酒挾瑟上
高堂

豔歌行

古辭

翩翩堂前燕冬藏夏來見兄弟兩三人流宕在他縣
故衣誰當一作爲補新衣誰當綻賴得賢主人覽取爲
吾組夫婿從門來斜倚西北眄語卿且勿眄水清石
自見石見何纍纍遠行不如歸

蜀漢

梁甫吟

諸葛亮

步出齊城門遙望蕩陰里里中有三墳纍纍正相似
問是誰家墓田疆古冶子一作氏力能排南山文能絕
地紀一作里一朝被讒言二桃殺三士誰能爲此謀國
相齊晏子

魏

却東西門行

武帝

鴻雁出塞北乃在無人鄉舉翅萬里餘行止自成行
冬節食南稻春日復北翔田中有轉蓬隨風遠飄揚
長與故根絕萬歲不相當柰何此征夫安得去四方

戎馬不解鞍鎧甲不離傍冉冉老將至何時返故鄉
神龍藏深泉猛獸步高崗狐死歸首丘故鄉安可忘

右一曲魏晉樂所奏

折楊柳行 一作遊僊詩 文帝

西山亦一作何高高高殊無極上有兩仙僮不飲亦

不食與我一丸藥光耀有五色解一服藥四五日身體

生羽翼輕舉乘浮雲倏忽行萬億流覽觀四海茫茫

非所識解二彭祖稱七百悠悠安可原老聃適西戎于

今竟不還王喬假虛辭赤松垂空言解三達人識真偽

愚夫好妄傳追念往古事憤憤千萬端百家多迂恠

聖道我所觀解四

孟津

良辰啓初節高會構極一作歡娛通天拂景雲俯臨四

達衢羽爵浮象樽珍膳盈豆區清歌發妙曲樂正奏

笙竽曜靈忽西邁炎燭繼望舒翊日浮黃河長驅旋

鄴都

清河作

方舟戲長水湛澹自浮沈絃歌發中流悲響有餘音

一作悲風音聲入君懷悽愴傷人心心傷安所念但

念恩情深願為晨風鳥雙飛翔北林

塘上行

甄皇后

蒲生我池中其葉何離離傍能行仁義莫若妾自知
衆口鑠黃金使君生別離念君去我時獨愁常苦悲
想見君顏色感結傷心脾念君常苦悲夜夜不能寐
莫以豪賢故棄捐素所愛莫以魚肉賤棄捐葱與薤
莫以麻枲賤棄捐菅與蒯出亦復苦愁入亦復苦愁
邊地多悲風樹木何條條從軍致獨樂延年壽千秋

種瓜篇

明帝

種瓜東井上冉冉自踰垣與君新爲婚瓜葛相結連
寄託不肖軀有如倚泰山兔絲無根株蔓延自登緣
萍藻託清流常恐身不全被蒙丘山惠賤妾執拳拳
天日照知之想君亦俱然

浮萍篇

曹植

浮萍寄清水隨風東西流結髮辭嚴親來爲君子仇
恪勤在朝夕無端獲罪尤在昔蒙恩惠和樂如瑟琴
何意今摧頽曠若商與參茱萸自有芳不若桂與蘭
新人雖可愛無若故所歡行雲有反期君恩儻中還
慊慊仰天歎愁心將何愬日月不恒處人生忽若寓
悲風來入懷一作惟淚下如垂露發篋造裳一作新
縫紉與素

仙人篇

仙人攬六著對博泰山隅湘娥拊琴瑟秦女吹笙竽
玉樽盈桂酒河伯獻神魚四海一何局九州安所如
韓終與王喬要我於天衢萬里不足步輕舉凌太虛
飛騰踰景雲高風吹我軀迴駕觀紫微與帝合靈符
閭闔正嵯峨雙闕萬丈餘玉樹扶道生白虎夾門樞
驅風遊四海東過王母廬俯觀五嶽間人生如寄居
潛光養羽翼進趨且徐徐不見軒轅氏乘一作龍出
鼎湖徘徊九天上與爾長相須

種葛篇

種葛南山下葛藟自成陰與君初婚時結髮恩義深
歡愛在枕席宿昔同衾衾竊慕棠棣篇好樂如瑟琴
行年將晚暮佳人懷異心思紀曠不接我情遂抑沈
出門當何顧徘徊步北林下有交頸獸仰見雙棲禽
攀枝長歎息淚下霑羅襟良馬知我悲延頸代我吟
昔爲同池魚今爲商與參往古皆歡遇我獨困於今
棄置委天命悠悠安可任

棄婦篇

石榴植前庭綠葉搖縹青丹華灼烈烈璀璨彩有光榮
光榮曄流離可以處淑靈有鳥飛來集拊翼以悲鳴

悲鳴夫何爲丹華實不成拊心長歎息無子當歸寧
有子月經天無子若流星天月相終始流星沒無精
棲遲失所宜下與瓦石并憂懷從中來歎息通雞鳴
反側不能寐逍遙於前庭踟躕還入房蕭蕭帷幕聲
寒帷更攝帶撫絃彈鳴箏慷慨有餘音要妙悲且清
收淚長歎息何以負神靈招搖待霜露何必春夏成
晚穫爲良實願君且安寧

遊覽

陳琳

高會時不娛羈客難爲心殷懷從中發悲感激清音
投觴罷歡坐逍遙步長林蕭蕭山谷風默默一作黯黯天

路陰惆悵忘旋反歔歔涕霑襟

一作巾

情詩

徐幹

高殿鬱崇崇廣廈淒泠泠微風起閨闈落日照階庭
踟躕雲屋下笑歌倚華楹君行殊不返我飾爲誰榮
鑪薰闔不用鏡匣上塵生綺羅失常色金翠暗無精
嘉肴旣忘御旨酒亦常停顧瞻空寂寂唯聞燕雀聲
憂思連相屬中心如宿醒

駕出北郭門行

阮瑤

駕出北郭門馬樊不肯馳下車步踟躕一作躑躅仰折枯
楊枝顧聞丘林中噉噉有悲啼借問啼者出何爲乃

如斯親母舍我歿後母憎孤兒饑寒無衣食舉動鞭
捶施骨消肌肉盡體若枯樹皮藏我空室中父還不
能知上冢察故處存亡永別離親母何可見淚下聲
正嘶棄我于此間窮厄豈有背傳告後代人以此爲
明規

七哀詩

丁年難再遇富貴不重來良時忽一過身體爲土灰
冥冥九泉室漫漫長夜臺身盡氣力索精魂靡所能
一作嘉穀設不御旨酒盈觴杯出壙望故鄉但見蒿
與萊

思慕詩

吳質

愴愴懷殷憂殷憂不可居徙倚不能坐出入步踟躕
念蒙聖主恩榮爵與衆殊自謂永終身志氣甫當舒
何意中見棄棄我就黃墟笑笑靡所恃淚下如連珠
隨沒無所益身死名不書慷慨自俛仰庶幾烈丈夫

擬古

何晏

雙鶴一作鴻鵠比翼遊群飛戲太清常恐失網羅憂禍一
旦并豈若集五湖順流唼浮萍逍遙放志意一作永寧曠中
懷何爲怵惕驚

與阮德如

嵇康

含哀還舊廬感切傷心肝良時邁數子譚慰臭如蘭
疇昔恨不早既而伴舊歡不悟卒永離念隔增息歎
事故無不有別易會良難郢人忽已逝匠石寢不言
澤雉窮野艸靈龜樂泥蟠榮名穢人身高位多災患
未若捐外累一作慮肆志養浩然顏氏希有虞隰子慕
黃軒涓彭獨何人唯志在所安漸漬殉近欲一往不
可攀生生在豫積勿以怵自寬南土旱不涼矜計宜
早完君其愛德素行路慎風寒自力致所懷臨文情
辛酸

遊仙詩

遙望山上松隆谷鬱青葱自遇一何高獨立迥無雙
願想遊其下蹊路絕不通王喬棄我去乘雲駕六龍
飄颻戲玄圃黃老路相逢授我自然道曠若發童蒙
採藥鍾山隅服食改姿容蟬蛻棄穢累結友家板桐
臨觴奏九韶雅歌何邕邕長與俗人別誰能覩其踪

荅嵇康

阮侃

雙美不易居嘉會故難常爰處憇斯土與子邁蘭芳
常願永遊集拊翼同迴翔不悟卒永離一別爲異鄉
四牡一何速征人告路長顧步懷想像遊目屢太行
撫軫增歎息念子安能忘恬和爲道基老氏惡強梁

患至有身災榮子知所康神龜實可樂明戒在剝腸
新詩何篤穆申詠增慨忼舒檢話良訊終然永厭藏
還誓必不食復與同故房願子盪憂慮無以情自傷
俟路忘所以聊以酬來章

詠懷五首

阮藉

楊朱泣岐路墨子悲染絲揖讓長離別飄飆難與期
豈徒燕婉情存亡誠有之蕭索人所悲禍釁不可辭
趙女媚中山謙柔愈見欺嗟嗟塗上士何用自保持

二

於心懷寸陰羲陽將欲宣揮袂撫長劍仰觀浮雲征
雲間有玄鶴抗志揚哀聲一飛冲青天曠世不再鳴
豈與鶉鷄遊連翩戲中庭

三

朝登洪坡顛日夕望西山荆棘被原野群鳥飛翩翩
鸞鷲時集作特棲宿性命有自然建木誰能近射干復
嬋娟不見林中葛延蔓相勾連

四

駕言發魏都南向望吹臺簫管有遺音梁王安在哉
戰士食糟糠賢者處蒿萊歌舞曲未終秦兵已復來
夾林非吾有朱宮生塵埃軍敗華陽下身竟爲土灰

壯士何慷慨志欲威八荒驅車遠行役受命念自忘
良弓挾烏號明甲有精光臨難不顧生身死魂飛揚
豈為全軀士效命爭戰場忠為百世榮義使令名彰
垂聲謝後世氣節故有常

晉

遊俠篇

張華

翩翩四公子濁世稱賢名龍虎相交爭七國竝抗衡
食客三千餘門下多豪英遊說朝夕至辯士自縱橫
孟嘗東出關濟身由雞鳴信陵西反魏秦人不窺兵

趙勝南詛楚乃與毛遂行黃歇北適秦太子還入荆
美哉遊俠士何以尚四卿我則異於是好古師老彭

簫史曲

簫史愛長一作少年羸女一作童顏火粒願排棄霞霧好
登攀龍飛逸一作竟天路鳳起出秦關身去長不返簫
聲時往還

答何劭

駕言歸外庭放志永棲遲相伴步園疇春艸鬱鬱滋
榮觀雖盈目親友莫與偕悟物增隆思結戀慕同儕
援翰屬新詩永歎有餘懷

情詩三首

北方有佳人端坐鼓鳴琴終晨撫管絃日夕不成音
憂來結不解我思存所欽君子尋時役幽妾懷苦心
初為三載別於今久滯淫昔耶生戶牖庭內自成陰
翔鳥鳴翠偶艸蟲相和吟心悲易感激俛仰淚流衿
願託晨風翼東帶侍衣衾

二

明月曜清景曈光照玄墀幽人守靜夜迴身入空帷
東帶侯將朝廓落晨星稀寐假交精爽覲我佳人姿
巧笑媚懽懽一作權靨聯娟眸與眉寤言增長歎悽然心

獨悲

三

君居北海陽妾在江南陰懸邈極修途一作修途遠山川
阻且深承歡注隆愛結分投所欽銜恩一作思篤守義
萬里託微心

中宮詩

成公綏

天地不獨立造化由陰陽乾坤垂覆載日月曜重光
治國先家道立教起閨房二妃濟有虞三母隆周王
塗山興大禹有莘佐成湯齊晉霸諸侯皆賴姬與姜
關雎思賢妃此言安可忘

豔歌行

傅玄

日出東南隅照我秦氏樓秦氏有好女自字為羅敷
首載金翠飾耳綴明月珠白素為下裙丹霞為上襦
一顧傾朝市再顧國為虛問女居安在堂在城南居
青樓臨大巷幽門結重樞使君自南來駟馬立踟蹰
遣吏謝賢女豈可同行車斯女長跪對使君言何殊
使君自有婦賤妾有鄙夫天地正厥位願君改其圖

明月篇

皎皎明月光灼灼朝日暉昔為春蠶絲今為秋女衣
丹唇列素齒翠彩發蛾眉嬌子多好言歡合易為姿

玉顏盛有時秀色隨年衰常恐新聞舊變故與細微
浮萍本無根一作浮萍無根本非水將何依憂喜更相接樂
極還自悲

答樂弘并序

傅咸

安樂令樂弘太傅鉅平侯羊公辟未就而公薨後
應司州之命舉秀才博文通濟之士余失和於府
當換為護軍司馬賦詩見贈答之云爾

鉅平作宰是貴是欽弓旌仍招嘉命胥尋鸞鳳養儀
戢翼幽林未附雅調以和韶音鉅平遐逝厲志彌深
肅肅京司清風裁邁乃延群彥龍集鳳會亦既斯降

萬里有賴聲發響應好結傾蓋

北芒客舍詩

劉伶

泱泱望舒隱躡黠玄夜陰寒雞思天曙擁翅吹長音
蚊蚋歸豐艸枯葉散蕭林陳醴發悴顏色歛暢真心
緼被終不曉斯歎信難任何以除斯歎付之與瑟瑟
長笛響中夕聞此消胸襟

荅大將軍祭酒顧令文

五章

陸雲

惟林有鸞惟淵有螭顯允明德實邦之基先后陟恪
子配于茲遵彼玉堂受言邁之一中原有軌世鮮克
蹈先民有懷子探其妙心猶水鑒涵景內照名若振

炎攄光外耀二相彼水鑒民胥攸臨矧曰明德人誰

弗欽寫我朶頤卽爾澄心義隆自古好邈在今三大

人有作興雲自天之子于升亦躍于淵景曳清霄響

發鳴弦義問弘集淑風載鮮四企予朔都非子孰念

豈無弱翰才不克瞻惠音聿來瓊華玉豔無德不報

念辭惟黍五

內顧詩二首

潘岳

靜居懷所歡登城望四澤春艸鬱青青桑柘何奕奕
芳林振朱榮淥水激素石初征冰未泮忽焉袵絺綌
漫漫二千里迢迢遠行客馳情戀朱顏寸陰過盈尺

夜愁極清晨朝悲終日夕山川信悠永願言良弗獲
引領訊歸期沈思不可釋

二

獨悲安所慕人生若朝露綿邈寄絕域眷戀想平素
爾情既來追我心亦還顧形體隔不達精爽交中路
不見山下松隆冬不易故不見澗邊栢歲寒守一度
無謂希見踈在遠分彌固

三月三日洛水作

潘尼

晷運無窮已時逝焉可追斗酒足爲歡臨川胡獨悲
暮春春服成百艸敷英蕤聊爲三日遊方駕結龍旂
廊廟多豪俊都邑有豔姿朱軒蔭蘭皋翠幙映洛湄
臨崖濯素手步水褰輕衣沈鈎出比目舉弋落雙飛
羽觴乘波進素俎隨流歸

招隱

張載

出處雖殊塗居然有輕易山林有悔悵人間實多累
鷓鴣翔窮冥蒲且不能視觀鷺遵臯渚數爲煢所繫
隱顯雖在心彼我共一地不見巫山火芝艾豈相離
去來捐時俗超然辭世僞得意在丘中安事愚與智

贈石季倫

棗腆

深蒙君子眷雅顧出群俗受寶取諸懷所贈非珠玉

凡我二三子執手携玉腕嘉言從所好企予結雲漢
望風整輕翮因虛舉雙翰朝遊清渠側日夕登高館

秋日

孫綽

蕭瑟仲秋日颼颼風雲高山居感時變遠客興長謠
疎林積涼風虛岫結凝霄湛露灑庭林密葉辭榮條
撫菌一作悲先落鬱一作松羨後凋垂綸在林野交
情遠市朝澹然古懷心濠上豈伊遙

孫登隱居詩

庾闡

靈巖霞蔚石室鱗構青松標空蘭泉吐瀉龍蒼可遊
芳津可漱玄谷蕭寥鳴琴獨奏先生體之寂坐幽岸
凝水結樸熙陽靡煥潛真內全飛榮外散凌崖高嘯
希風朗彈道有冥廢運有昏消達隱不巖玄跡不標
或曰先生晦德逍遙稽子秀達英風朗烈道雋薰芳
鮮不玉折兆動初萌妙鑿奇絕翹首丘冥仰想玄哲

夜聽擣衣

曹毗

寒興御紈素佳人理衣衾一作治衣襟冬夜清且永皓月
照堂陰纖手疊輕素朗杵叩鳴砧清風流繁節迴颼
灑微吟嗟此嘉運速悼彼幽滯心二物感余懷豈但
聲與音


和郭王簿二首

陶潛

藹藹堂前林中夏貯清陰凱風因時來回颺開一作吹
我襟息交遊閒業臥起弄書琴園蔬有餘滋舊穀猶
儲今營已良有極過足非所欽春林作美酒酒熟吾
自斟弱子戲我側學語未成音此事真復樂聊用忘
華簪遙遙望白雲懷古一何深

二

和澤周三春清涼素秋節露凝無遊氛天高肅景澈
陵岑聳逸峰遙瞻皆奇絕芳菊開林耀青松冠巖列
懷此貞秀姿卓爲霜下傑銜觴念幽人千載撫爾訣
檢素不獲展厭厭竟良月



1
17